



Na osnovu člana 16. Zakona o Vladi Unsko-sanskog kantona („Službeni glasnik Unsko-sanskog kantona”, broj: 5/08), člana 36. Zakona o izvršavanju Budžeta Unsko-sanskog kantona za 2021. godinu („Službeni glasnik Unsko-sanskog kantona“, broj: 10/21), na prijedlog Ministarstva privrede, Vlada Unsko-sanskog kantona na sjednici održanoj dana 12.11.2021. godine, d o n o s i :

ODLUKU

o kriterijima i postupku dodjele sredstava odobrenih u Budžetu Unsko-sanskog kantona za 2021. godinu putem Ministarstva privrede sa pozicije tekući transferi neprofitnim organizacijama

POGLAVLJE I. OPĆE ODREDBE

Član 1. (Predmet)

Ovom Odlukom utvrđuju se kriteriji i postupak dodjele budžetskih sredstava (u daljem tekstu: sredstva) odobrenih u Budžetu Unsko-sanskog kantona za 2021. godinu putem Ministarstva privrede (u daljem tekstu: Ministarstvo) sa pozicije Tekući transferi neprofitnim organizacijama (udruženjima i komorama), svrha, sredstva za implementaciju, pravo učešća, uslovi učešća, maksimalan iznos sredstava koji se dodjeljuju, namjena utroška sredstava i rok za implementaciju, kriteriji za raspodjelu sredstava, način prijave i potrebna dokumentacija, obrada prijava i izbor korisnika, ugovor o dodjeli sredstava, izvještavanje o utrošku sredstava, raspodjela sredstava i poništenje javnog poziva, te stupanje na snagu.

Član 2. (Cilj)

Cilj Odluke je pružanje podrške udruženjima i komorama čije je sjedište na području Unsko-sanskog kantona (u daljem tekstu: Kanton), čiji programski ciljevi i djelatnosti utvrđene Statutom udruženja su usmjerene na područja iz oblasti koje su u nadležnosti Ministarstva, te koji provode projekat iz neke od prioritarnih oblasti definisanih ovom Odlukom na području Kantona.

Član 3. (Sredstva za implementaciju)

Sredstva za implementaciju ove Odluke obezbjeđena su u Budžetu Ministarstva na ekonomskom kodu 614300 - „Tekući transferi neprofitnim organizacijama“ u iznosu od 100.000,00 KM (slovima: stotinhiljadakonvertibilnihmaraka).

POGLAVLJE II. PRAVO UČEŠĆA

Član 4. (Pravo učešća)

Pravo učešća imaju udruženja i komore koja/e imaju sjedište na području Kantona, registrovana u skladu sa Zakonom o udruženjima i fondacijama („Službene novine Federacije BiH“, broj: 45/02), Zakonom o udruženjima i fondacijama („Službeni glasnik BiH“, broj: 32/01, 42/03, 63/08 i 76/11), Zakonom o privrednim komorama u Federaciji BiH („Službene novine Federacije BiH“, broj: 35/98 i 34/03) i Zakonom o obrtu i srodnim djelatnostima u Federaciji BiH („Službene novine Federacije BiH“, broj: 75/21).

Član 5. (Uslovi učešća)

Pravo na dodjelu sredstava ostvaruju udruženja i komore definisane u članu 4. ove Odluke, a koje ispunjavaju slijedeće uslove:

- a) da su upisani u Registar u Ministarstvu pravosuđa i uprave Kantona, Federalnog ministarstva pravde ili Ministarstva pravde Bosne i Hercegovine,
- b) da su registrovani u skladu sa Zakonom o privrednim komorama u Federaciji BiH i Zakonom o obrtu i srodnim djelatnostima u Federaciji BiH,
- c) da imaju sjedište na području Kantona,
- d) da djeluju najmanje godinu dana do dana objave Javnog poziva,
- e) da uredno izmiruju direktne poreze, doprinose za PIO/MIO i zdravstveno osiguranje,
- f) da realizuju projekte usmjerene na područja iz oblasti koje su u nadležnosti Ministarstva,
- g) da su dostavile izvještaj o namjenskom utrošku sredstava po osnovu ranije doznačenih sredstava Ministarstva (ukoliko su ista ostvarili),
- h) da do dana objave Javnog poziva nisu dobili sredstva za predloženu namjenu (projekat) iz drugog izvora.

Član 6. (Maksimalni iznos sredstava koji se dodjeljuje)

Maksimalan iznos sredstava koji se dodjeljuje po jednom korisniku udruženja iznosi 7.000,00 KM (slovima: sedamhiljadakonvertibilnihmaraka), a komorama 10.000,00 KM (slovima: desetihiljadakonvertibilnihmaraka).

Član 7. (Namjena utroška sredstava i rok za implementaciju)

- (1) Sredstva iz člana 6. ove Odluke koriste se za sufinansiranje projektnih aktivnosti iz sljedećih prioriternih oblasti:
 - a) Razvoj i afirmacija poduzetništva i obrta, interesno umrežavanje poduzetnika i obrtnika, organizovano zastupanje interesa poduzetnika i obrtnika na zajedničkom

tržištu kao i promocija razvojnih potencijala (manifestacije, sajmovi, izložbe i drugi oblici promocije);

- b) Ekonomsko osnaživanje kroz edukaciju i osposobljavanje specifičnih ciljnih grupa (osobe sa invaliditetom, žensko i socijalno poduzetništvo, poduzetničke inicijative mladih);
 - c) Turizam, promocija turističkih destinacija, učešće na turističkim manifestacijama u zemlji i inostranstvu, izgradnja turističke infrastrukture i suprastrukture, turističke signalizacije, unaprjeđivanje postojeće turističke ponude, poticanje domaćeg turizma i receptivnog turizma i projekti koji doprinose razvoju turističkog proizvoda u skladu sa Zakonom o turizmu;
 - d) Očuvanje tradicije i kulturne baštine;
 - e) Podrška razvoja tradicionalnih i starih proizvoda i ruralnog poduzetništva;
 - f) Edukacija članova komora i udruženja.
- (2) Neprihvatljivi troškovi za koje se ne mogu koristiti sredstva su: troškovi tekućih komunalnih usluga (telefon, struja, voda, plin i sl.), lični dohodak (plaće, doprinosi, službena putovanja i ostale naknade radnika korisnika sredstava), konzumiranje jela i pića.
- (3) Rok za implementaciju projekta po potpisanom Ugovoru za korisnike sredstava iz stava (1) ovog člana je maksimalno 9 mjeseci od dana doznačavanja sredstava korisnicima.
- (4) Svako korištenje odobrenih sredstava suprotno namjenama utvrđenim stavom (1) ovog člana smatrat će se nenamjenskim utroškom.

Član 8.
(Kriteriji za raspodjelu sredstava)

Rb	Kriterij	Uslovi	Broj bodova	Izvor verifikacije (dostavljena dokumentacija)
1.	Namjena projekta (Projekti definisani članom 7. stav (1) Odluke)	Projekti iz oblasti definisani članom 7. stav (1) alineja c)	30	Prijavni obrazac
		Projekti iz oblasti definisani članom 7. stav (1) alineja a), b), d), e) i f)	20	
2.	Broj zaposlenih	1 zaposlen i više	15	Lista osiguranih lica izdana od strane Porezne uprave
3.	Vlastito učešće u ukupnoj vrijednosti projekta	Do 50%	10	Izjava
		Preko 50%	15	
4.	Broj članova udruženja/komore	Do 50 članova	5	Popis članova udruženja/komore
		Preko 50 članova	10	
5.	Poslovanje u jedinicama lokalne samouprave	Razvijene	10	Uredba o izradi indeksa razvijenosti u F BiH, Federalni Zavod za programiranje razvoja
		Nerazvijene	15	
		Izrazito nerazvijene	20	

				(Socioekonomski pokazatelji po općinama FBiH 2020)
6.	Korisnik poticaja Ministarstva privrede (za period 2018.-2020. godinu)	Nije ostvario pravo na poticaj za navedeni period	10	Službena evidencija Ministarstva
		Korisnik sredstava	5	

POGLAVLJE III. JAVNI POZIV

Član 9.

(Način prijave i potrebna dokumentacija)

- (1) Sredstva se dodjeljuju na osnovu Javnog poziva kojeg raspisuje Ministarstvo, a koji će se objaviti u Unsko-sanskim novinama „Krajina“ i na web stranici Vlade Unsko-sanskog kantona (u daljem tekstu: Vlada Kantona): www.vladausk.ba.
- (2) Podnosilac prijave prilikom prijave na Javni poziv obavezno dostavlja sljedeću dokumentaciju:
 - a) Popunjen, potpisan i ovjeren Prijavni obrazac (koji se preuzima sa web stranice Vlade Kantona www.vladausk.ba);
 - b) Budžet Projekta koji jasno definiše izvore sredstava, potpisan i ovjeren od strane podnosioca prijave (preuzima sa web stranice Vlade Kantona www.vladausk.ba);
 - c) Rješenje o registraciji od nadležnog organa sa zadnjim izmjenama podataka (ovjera ne starija od 3 mjeseca od dana objave Javnog poziva);
 - d) Ovjerena fotokopija Uvjerenja o poreznoj registraciji (ID broj) (ovjera ne starija od 3 mjeseca od dana objave Javnog poziva);
 - e) Original ili ovjerena fotokopija Uvjerenja od Porezne uprave o izmirenju direktnih poreza, doprinosa za PIO/MIO i doprinosa za zdravstveno osiguranje za sve uposlene (ne starije od 3 mjeseca od dana objave javnog poziva);
 - f) Original ili ovjerena fotokopija Liste osiguranika izdana od strane Porezne uprave ne starija od 30 dana od dana objave javnog poziva;
 - g) Fotokopija bilansa stanja i bilans uspjeha za 2020.godinu;
 - h) Za udruženja koja na dan objave Javnog poziva djeluju godinu dana dostavljaju fotokopiju bilans stanja i bilans uspjeha zaključno sa 31.10.2021. godine;
 - i) Fotokopija dokumenta iz kojeg je vidljiv broj transakcijskog računa na koji će se sredstva doznačiti (ugovor, karton deponovanih potpisa, potvrda);
 - j) Izjava podnosioca prijave da do dana objave Javnog poziva nisu ostvarili poticaj od Vlade Kantona, Ministarstva ili drugog izvora, za realizaciju predloženog projekta;
 - k) Izjava o realizaciji projekta (potpisana i ovjerena od strane podnosioca prijave, dostupna na web stranici Vlade Kantona www.vladausk.ba);
 - l) Ako postoji partner na projektu dostaviti dokaz o visini sredstava sa kojima će isti sufinancirati projekat (sporazum o saradnji ili ugovor ili izjavu). Izjava se dostavlja u originalu i datum izjave ne smije biti stariji od 3 mjeseca od dana objave Javnog poziva. Sporazum ili Ugovor se dostavlja u originalu ili ovjerenoj kopiji i datum ovjere ugovora ili sporazuma ne smije biti stariji od 3 mjeseca od dana objave Javnog poziva;

- m) Popis članova udruženja/komore ovjeren i potpisan od strane predsjednika udruženja/komore.
- (3) Udruženja koja nemaju zaposlenog/ih ne dostavljaju dokumentaciju navedenu pod alinejom e) i f) stav (2) ovog člana.
- (4) Prijave će biti odbačene kao nepotpune i neće biti predmet daljeg razmatranja ako ne sadrže kompletnu dokumentaciju koja se traži Javnim pozivom.

Član 10.

(Način podnošenja prijave)

- (1) Prijave sa potrebnom dokumentacijom dostavljaju se neposredno na protokol Vlade Kantona ili preporučeno putem pošte na adresu:

Ministarstvo privrede Unsko-sanskog kantona,

Ul. Alije Đerzeleza br.2, 77 000 Bihać

s naznakom:

Prijava po Javnom pozivu „Podrška udruženjima i komorama“

„NE OTVARAJ“

Na poleđini koverta obavezno navesti naziv podnosioca prijave i adresu

- (2) Rok za podnošenje prijave je 15 (petnaest) dana od dana objave Javnog poziva.
- (3) Neblagovremene prijave koje su dostavljene nakon isteka roka određenog Javnim pozivom neće se uzeti u razmatranje i iste se neotvorene vraćaju podnosiocu prijave.
- (4) Podnosioci prijave mogu podnijeti prijavu samo za jedan projekat iz jedne oblasti po ovom Javnom pozivu. U slučaju više prijave istog podnosioca po istom ili različitim projektima iz više oblasti sve prijave će biti odbačene kao neosnovane i neće biti predmet daljeg razmatranja.

Član 11.

(Obrada prijave i izbor korisnika)

- (1) Za obradu prijave po Javnom pozivu „Podrška udruženjima i komorama“ ministar Ministarstva privrede (u daljem tekstu: Ministar) rješenjem imenuje Komisiju.
- (2) Komisija ima zadatak da u skladu sa propisanim kriterijama i procedurama utvrđenim ovom Odlukom i Javnim pozivom izvrši evaluaciju i bodovanje prispjelih prijave, sačini Preliminarnu rang listu korisnika sredstava i listu podnosilaca prijave čije su prijave neblagovremene, nepotpune i neosnovane, te iste dostavi ministru. Liste se objavljuju na web stranici Vlade Kantona: www.vladausk.ba., a podnosioci prijave se neće pojedinačno obavještavati.
- (3) Na objavljene liste svi podnosioci prijave imaju pravo prigovora koji se podnosi Ministarstvu u pisanoj formi u roku od 5 dana od dana objavljivanja listi na web stranici Vlade Kantona.
- (4) Nakon isteka roka za prigovor i nakon rješavanja po uložnim prigovorima u roku od 5 dana od dana isteka roka za podnošenje prigovora, ministar donosi Konačnu rang listu korisnika sredstava na koju Vlada Kantona daje saglasnost i ista se objavljuje na web stranici Vlade Kantona.

Član 12.
(Ugovor o dodjeli sredstava)

- (1) Nakon dobijanja saglasnosti Vlade Kantona na Konačnu rang listu korisnika sredstava Ministarstvo sa odabranim korisnicima zaključuje Ugovore o dodjeli sredstva.
- (2) Ugovor o dodjeli sredstava iz stava (1) ovog člana sadrži: ugovorne strane, predmet i cilj Ugovora, odobreni iznos sredstava i doznačavanje, obaveze i odgovornosti ugovornih strana, trajanje i raskid Ugovora i ostale odredbe.

POGLAVLJE IV: NADZOR NAD UTROŠKOM SREDSTAVA

Član 13.
(Izvještavanje o utrošku sredstava)

- (1) Korisnici sredstava u skladu sa ugovorom iz člana 12. ove Odluke obavezni su dodijeljena sredstva iz budžeta koristiti namjenski i dužni su dostaviti Izvještaj na propisanom obrascu „Izvještaj o utrošku sredstava“ sa kompletnom dokumentacijom kojom se dokazuje namjenski utrošak sredstava za cijeli projekt, bez obzira na izvor finansiranja, po projektnom prijedlogu navedenom u Prijavnom obrascu.
- (2) Uz Izvještaj iz stava (1) ovog člana, korisnici sredstava dostavljaju i Izjavu o namjenskom utrošku sredstava ovjerenu kod nadležnog gradskog/općinskog organa ili notara (dostupna na web stranici Vlade Kantona www.vladausk.ba).
- (3) Dokumentacija koja se dostavlja uz Izvještaj o utrošku sredstava, a kojom se dokazuje namjenski utrošak sredstava mora biti u originalu ili ovjerenoj kopiji (ugovori, računi, izuzev izvoda iz banke o izvršenom plaćanju računa i fotodokumentacije).
- (4) Rok za dostavu izvještaja je *najkasnije 15 dana od dana isteka roka za implementaciju projekta*, definisan članom 7. stav (3) ove Odluke.
- (5) Ministarstvo vrši nadzor namjenskog trošenja sredstava odobrenih korisnicima na osnovu dostavljenih Izvještaja, a po potrebi i neposrednim nadzorom kod korisnika sredstava, a na osnovu valjanih izvora verifikacije navedenih u samoj prijavi.
- (6) Ukoliko Korisnik sredstava ne dostavi Izvještaj o utrošku sredstava ili nenamjenski utroši sredstva, Ministarstvo pokreće zakonom propisan postupak za povrat finansijskih sredstava i izriče zabranu pristupa budućim poticajnim sredstvima.
- (7) O utrošenim sredstvima po ovoj Odluci Ministarstvo će u skladu sa Odlukom o usvajanju programa utroška, a nakon dostavljanja Izvještaja o utrošku sredstava, izvjestiti Vladu Kantona.

Član 14.
(Raspodjela sredstava i poništenje Javnog poziva)

- (1) Ministarstvo će izvršiti raspodjelu sredstava u skladu sa ostvarenim bodovima podnosilaca prijava. Ukoliko zahtjevana poticajna sredstva budu veća u odnosu na planirana, Ministarstvo će raspodjelu istih izvršiti u skladu sa utvrđenom Konačnom rang listom korisnika sredstava do utroška planiranih sredstava utvrđenih za implementaciju ove Odluke.

- (2) U postupku po Javnom pozivu Ministarstvo zadržava pravo da poništi Javni poziv u bilo koje vrijeme do zaključenja ugovora, bez obaveze pismenog ili usmenog obrazloženja.
- (3) U slučaju nedostatka sredstava u Budžetu Kantona obustavlja se realizacija dodjele sredstava.
- (4) Ministarstvo ne snosi troškove nastale u vezi sa prijavom na Javni poziv.
- (5) Prispjela dokumentacija će se vratiti podnosiocima prijave u slučajevima utvrđenim u stavu (2) i (3) ovog člana.

POGLAVLJE V: PRELAZNE I ZAVRŠNE ODREDBE

Član 15. (Stupanje na snagu)

Ova Odluka stupa na snagu danom donošenja i objavit će se u „Službenom glasniku Unsko-sanskog kantona“.

Broj: 03-017-3692/2021
Bihać, 12.11.2021. godine



